

**Ivittuut kommunianni Ikkap kangerluata iluani qinnguata eqqissisimatitaanissaa pillugu Namminersornerullutik Oqartussat nalunaarutaat nr. 11 25. april 2000-imeersoq Atuussimasoq (Historisk)**

Kalaallit Nunaanni pinngortitamik allanngutsaaliuineq pillugu Inatsisartut inatsisaani nr. 11-mi 12. november 1980-imeersumi § 3, imm. 1, nr. 22 aamma § 19 naapertorlugit aalajangersarneqarpoq:

§ 1. Ikkap kangerluata iluani qinngua, Ivittuut kommunianniittoq eqqissisimatitassanngortinneqar-poq kangerluup qinnguaniittut Ikkap sukaanik taaneqartartut illersorneqarnissaat siunertaralugu. Sukat immikkuullarissumik pinngorsimanertik aammalu aatsitassatigut katitigaanertik pissutigalugu ilisimatuussutsikkut, ilinniartitaanermut tunngasutigut aammalu qasuersaariartarfissatut pingaarute-qarput. Sukat naasoqarfiulluarlutillu uumasooqarfiulluarputtaaq.

Imm. 2. Nuna eqqissisimatitaaq nunap assingani ilanngunneqartumi nalunaarsimavoq, tassaallunilu allorniusap sanimukaartoq malillugu titarneq avannarpasissutsimi 61°11'-kkoortumiit Ikkap kangerlua, kangerlullu qinngua tikillugu.

§ 2. Kikkulluunniit kangerlummukarsinnaallutillu Ikkami sukaliarsinnaapput, taamaaliornermi eqqissisimatitsinermi siunniunneqartoq sumiginnarneqassanngippat, takuuk § 1, imm. 1.

§ 3. Eqqissisimatitap iluani imaatigut 3 knobiniit sukkanerusumik ingerlanissaa akuerineqanngilaq, aamma angallat 50 cm-ininngarnit itsineqortunerussanngilaq. Sukat ersittut kaajallallugit 50 miiterinik qaninnerusumiit imaatigut angalanermi taamaallaat umiatsiaaraq, qajaq assigisaalluunniit motooreqanngitsoq atorneqarnissaa inerteqqutaanngilaq.

§ 4. Eqqissisimatitap iluani kilisalluni allanilluunniit atortoqarluni Ikkami sukanik ajoqusiisinnaa-sumik aalisarneq inerteqqutaavoq.

§ 5. Ikkami sukanik qanorluunniit iliornikkut nungutitsisinnaasumik iliuseqarneq sunaluunniit, tamatumani ilanngullugu immap naqqaniittunik aatsitassanik Ikaitinik nukersorluni piianeq imaluunniit sukaminernik katassimasunik katersuineq inerteqqutaapput.

§ 6. Eqqissisimatitap iluani eqqagassat, nalunaaqutsersuutit aammalu ilisimatusaatinut atortut qimaannarnissaat inerteqqutaapput.

§ 7. Avatangiisinut Pinngortitamullu Pisortaqarfik qinnuteqaateqartoqareerneragut nalunaarummit matumanga aalajangersakkaniit immikkut akuersissuteqarsinnaavoq.

§ 8. §§ 3-miit 6-imullu aalajangersakkanik unioqquitsineq akiliisitaanermik kinguneqarsinnaavoq.

§ 9. Nalunaarut 15. maj 2000 atortuulerpoq.

*Namminersornerullutik Oqartussat, 25. april 2000.*

Alfred Jakobsen

/

Hans J. Høyer

---

Ilanngussaq

Ilanngussaq bkg 11-2000

